



Laura Táunâjik
Inatsisartuni ilaasortaq
Inatsisartut
/MAANI

Sermiligaap kangerluani misileraalluni aalisarneq pillugu § 37 naapertorlugu apeqqutip nr. 2015-231-ip akineqarnera

Inatsisartut Suleriaasianni § 37, imm. 1 naapertorlugu aalisarnermut tunngasunik Naalakkersuisunut apeqquteqaateqarputit. Apeqqutit uannut akineqartussanngortinneqarsimapput.

21-09-2015
Sags nr. 2015 - 9720
Akt. nr. 1197627

Postboks 269
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.naalakkersuisut.gl

Apeqqutit

1. Kilisaatit marluk Sermiligaap eqqaani Qinnngertuarmini qalerallinnik misileraallutik qassusersortut kikkunnit qangalu akuersissummik tunineqarpat?
2. Qassusersorfigineqaqqusaanngittumi qassusersorneq kikkunnit akisussaaffigineqar-pa?
3. Sooq innuttaasut qanimut tusarniaavigineqanngillat aamma peqataatinneqanngillat?
4. Inatsisitigut misileraasinnaanermut killiliunneqarsimasut sumut killeqarpat?

Akissutit

1) 2015-imut tunngatillugu Tunumi sinerissap qanittuani misileraalluni aalisartitsisoqarpoq, tassanilu kangerlunni aamma sømilinik pingasunik killeqarfik angullugu aalisartoqarnissaanik akuersissuteqartoqarsimavoq, tassa Tunu tamakkerlugu nunap iluaniittuni. Taamaalilluni Sermiligaap kangerluani aalisartoqarsinnaanera aamma akuerineqarpoq. Aalisartoqarnissaanut tassunga qinnuteqartut Naalakkersuisunit akuerineqarsimapput. Kalaallit Nunaanni nunap iluaniittuni qalorsuit atorlugit aalisartoqarnissaa inerteqqutaavoq, angallatillu tamaani aalisartut qassutinik, ningittakkanik pullatinik atortoqarput.

2) Sumiiffimmi pineqartumi qassusersorluni aalisarnissaq inerteqqutigineqanngilaq. Sinerissap qanittuani qalerallinniarneq pillugu Namminersorlutik Oqartussat nalunaarutaanni nr. 11, 28. august 2014-imeersumi § 10 naapertorlugu nunap iluani inuussutissarsiutigalugu aalisarnermi qassusersorluni qalorsuilluunniit atorlugit qalerallinniarneq inerteqqutaavoq, matumani kommunit ileqqoreqqusaatigut immikkut akuersissuteqartoqarsimanngippat. Taamaattoq Kommuneqarfik Sermersuumi Tunumi aalisartoqarnissaa pillugu tassanngaanniit immikkut akuersissuteqartoqarsimavoq. Kommuneqarfik Sermersuumi inuussutissarsiutigalugu qalerallinniarneq pillugu ileqqoreqqusaq 26. november 2013-imeersaq naapertorlugu Kommuneqarfik Sermersuup sineriaani kangimut sammisumi qassusersorluni qalerallinniarneq akuerineqarpoq. Qalerallit saniatigut aalisakkanut allanut tunngatillugu Piujuartitsinissaq siunertaralugu aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaanni nr. 12, 17. november 2011-meersumi § 10 atuuppoq. Nalunaarut siuliani taaneqartoq naapertorlugu nunap iluani

qassusersorluni aalisarnissaq akuerineqarpoq, akerlianilli qalorsuit unqusiniutillu atorlugit aalisarnissaq inerteqqutaalluni.

Tamakkulu pissutigalugit misileraalluni aalisartunut qassutinik, ningittakkanik pullatinilluunniit atuisoqarsinnaanera akuersissutigineqarsimavoq. Tamanna atuuppoq qaleralinniarnermut, aalisakkanillu allanik aalisarnissamut akuersissutinik tunineqarsimasunut (saarullit, suluppaakkat, nataarnat, brosmet, saattussat, qeeqqat eqaluillu).

3) Misileraalluni aalisarnek immikkut ittutut taaneqarsinnaanngitsoq matumani pineqarmat nujukkami inuit tusarniaaffigissallugit Naalakkersuisut pisariaqartissimanngilaat. Misileraalluni aalisarnermi siunertarineqarpoq Tunumi nutaanik aalisartoqarnissaanut tunngavissaqarnersoq paasiniaaffigissallugu. Taamaammat siunertaavoq misileraalluni aalisarnek Tunumi aalisarnerup ineriartortinnissaanut iluaqutaassasoq. Aammattaaq najukkami aalisartut arlaqartut angallammut Sermiligaap kangerluani aalisartumut inuttatut ikisimapput.

4) Misileraalluni aalisarnek Aalisarnermut Inatsit aamma Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaatigut nr. 9, 17. juli 2014-imeersutigut aalajangersarneqarpoq. Aalisarnermut Inatsimmi kapitali 9-mi takuneqarsinnaavoq Pinngortitaleriffik, Danmarks Miljøundersøgelser allalluunniit misileraallutik aalisarsinnaasut, tamatumani akuersissummik Naalakkersuisunit piniartoqarsimappat. Tassani aamma takuneqarsinnaavoq misileraalluni aalisarsinnaanermut piumasaqaatinik Naalakkersuisut aalajangersaasartuusut, matumanilu Pinngortitaleriffimmiit oqaaseqaammik piniartoqareerneratigut.

Aalisarsinnaanermut akuersissutinik tunniussinermut atatillugu aalajangersakkat qulaani taaneqartut Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaanni nr. 9, 17. juli 2014-imeersumi aalajangersakkamik ilaneqarput. Nalunaarut taanna naapertorlugu piumasaqaatit makku tunngavigalugit qinnuteqartoqareerneratigut inunnut suliffeqarfinnlluunniit misileraalluni aalisartoqarnissaanut aalisarsinnaanermut akuersissutinik tunniussisoqartarpoq: aalisakkamut pisassiissutit aalajangersarneqartut, qinnuteqaatit tamarmiusut aamma tunniussisoqarneranut piumasaqaatit Naalakkersuisunit aalajangersarneqartut malillugit.

Inuulluaqqusillunga

Karl-Kristian Kruse